

«Segir betg mo ina spassegiada»

Cuira: Discurs da Bumaun da la pbd grischuna

DA GION NUTEGN STGIER / ANR

■ **Il president Jon Domenic Parolini ha fatg ina bilantscha da l'onn passà e preschentà las finamiras da las elecziuns chantunalas 2014. Cussegliera governativa Barbara Janom Steiner duai vegnir confermada en ses uffizi cun il meglier resultat.** En in rom empernaivel e cordial èn las commembras ed ils commembers da la direcziun da la Partida burgais-democratica (pbd) dal Grischun s'entupadas a Cuira cun represchentantas e represchentants da las medias chantunalas. Cun prosecco han tuts fatg viva sin l'onn nov e cuminaivel discurre dal passà e dal futur da la pbd da noss chantun. Mal haja cunzunt fatg il 2013 il naufragi da la votaziun pertutgant ils gieus olimpics 2022 en il Grischun, ha ditg *Jon Domenic Parolini*, il president da la pbd. Cun integrar en quel project d'asper San Murezzan e Tavau er autras regiuns sco per exempel Cuira e Laax avess quel plan gi probabel dapli credit tar votantas e votants, ha manegià Jon Domenic Parolini. Losch è dentant il president da la pbd grischuna ch'il parlament chantunal ha acceptà tar la sessiun da december 2013 la refurma da la gulivaziun da finanzas. Quai saja cunzunt in merit da cussegliera governativa



Barbara Janom Steiner duai er davent dal matg appartegnair a la regenza grischuna e da nov less Jon Domenic Parolini far part da quel gremium.

FOTO G. N. STGIER

Barbara Janom Steiner che haja contribuì grazia a sia cumpetenza per quel success. En l'avegnir vegnia la pbd a s'engaschar per la realisaziun da la gulivaziun da finanzas e lura er per la fusiun da vischnancas e natiralmain era per la

realisaziun da la refurma territoriala, ha accentuà Jon Domenic Parolini.

Visitar las secziuns localas e regiunalas da la pbd

La sfida la pli gronda en l'onn nov saja bain dad avair success tar las tschernas chantunalas dals 18 da matg, ha ditg Jon Domenic Parolini. Barbara Janom Steiner duai vegnir confermada en la regenza grischuna e quai cun il meglier resultat da tuts candidats. Da defender il post da cusseglier guvernativ *Hansjörg Trachsel* saja segir betg mo ina spassegiada, ha menziunà Jon Domenic Parolini, sez candidat per quel post. Il capo da la vischnanca da Scuol è dentant da buna speranza, er sch'i saja da quintar cun ina ferma concorrenza. Ina ulteriura finamira per la pbd grischuna è era dad esser sunter las elecziuns 2014 vinavant represchentada cun 27 deputadas e deputads en il parlament grischun, sche betg cun daplis dunnas ed umens, è vegnì ditg tar quel discurs da Bumaun a Cuira. *Andreas Felix*, il schef da fracziun da la pbd, ha ditg che a la fin da quest mais cumenzia il cumbat electoral e tant sco pussaivel vegnia la pbd a visitar tut las secziuns localas e regiunalas per preschentar candidatas e candidats. Anc nagin tema sajan dentant las elecziuns naziunalas 2015, ha ditg Andreas Felix.